



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сторони 60 зл., $\frac{1}{4}$ сторони 35 зл., $\frac{1}{8}$ стор. 20 зл., $\frac{1}{16}$ стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знижка.

Контото чекове Нр. 404.155.

Село мусит само дбати о свое здоровье.

Жиеме в часах, коли труд поодинокого человека не може обезпечити его и его родины. Гваранцию добробыта дае аж лучший труд цільных мас людей, котры лучат ся разом в кооператывы и таким способом заепвняють своим членам добрый фабричный товар по низких цінах и уцтывы ціны за рольны продукты.

Аж втотчас, коли селянина не выкористат никто при продажи и при купні, може он быти певный, же при оцадности и вытревалом и умілом труді осягне он со своего господарства выстарчаючи на прокормлене своих родин доходы.

Зрозуміли того многы селяне и с каждым роком повстають по селах новы кооператывы. Многы кооператывы располагають уж великыма общественныма капиталами и опановали сельску торговлю и промысл, котры давнійше експлюатовали ріжны спекулянты.

Кооператывы хоронят селянина перед материяльныма втратами и обезпечают ему лучшу и певнійшу будучность. Прото тыж и селянин зачинат цінити кооператывну акцию и относит ся до ней доброжелательно.

Лем оден род кооператывов ест у нас совсем занедбанный, а навіт аж и незнанный. Ест то кооператыв здоровья. Люды, котры напругают всі свои силы для материяльного добра, забывают о наибольшом богатстві человека, яким ест здоровье и не робят нич для поддержания своих сил. Населене по селах жие часто в тїсных и нездоровых поміщенях, принимают невыстарчающий корм, а в случаях хвороты, не має ани лікара, ани лікарств, ани жадной фаховой опеки. Через тот недостаток умерат много людей, особенно дїтей, а много также не розвиват ся нормально и в результаті має много калік и недорозвиненых.

Творцом кооператывов здоровья ест др. Гавриил Коича с Югославии. В Польці ест всего оден кооператыв здоровья основанный через управителя Народного Университета в Гаях в селі Маркові пшеворского повіта. Ціль того кооператыва ест поднести стан здоровья серед членов и сотрудничати в их культурном розвитю.

Кооператыв дае своим членам на случай

хвороты дешеvu лікарску помоч и лікы по зниженной ціні, помагат членам до покупки предметов, потребных до поднесеня здоровья, основуе и удержуе заведеня для ратованя здоровья, уділят членам на случай смерти пожичок, або иной помочи и дбае о гигиеничны условия серед членов.

Членом кооператыва може быти каждый, кто вылатит 50 гр. вписового и 10 зл. уділу. С лікарской помочи користат ціла родина члена и домашны, котры сут на удержаню члена.

Так приблизительно представлят ся статут кооператыва здоровья. Закладають его се-

ляне власныма силами, але за тых пару злых обезпечают собі на случай хвороты лікарску помоч и лікы по зниженной ціні. Крім того лікар уділят бесплатно фаховых порад беременным женам и опекуе ся здоровьем дїтей.

Кооператывы тоты закладат ся для килькох доокрестных сел (у нас можна бы было закладати их для каждой гмины). Выдаток невеликий, а помоч выдатна, бо килькож то людей умерат перед часом по селах. Килько-то малых дїточок отходит от нас лем прото, же мати не може позволить собі на спровадження с далекого міста лікара, а сама не знае як помочи дїтині!

Якы опасности грозят советской власти.

Знанный французский экономист Люсен Роме, котрый вернул недавно с подорожи на Далекий Выход, описал в газеті „Фигаро“ свои спостереження о справах азиатско-европейских и о опасностях, якы грозят советской власти.

Роме пише, же Советам грозят три опасности: со стороны Японии, со стороны Німеччины и от внутренней оппозиции.

Дві перши сут военного характера и меже нима ест тотя ріжница, же с Японіом Росія сусідуе непосредно, а от Німеччины ест Росія отділена Польщом. Прото тыж на границах Японии мусят Советы держати сильну армию, котра, як пише Роме, ест лучше заосмотрена и сильнійша от армии японской.

На западі Советы старають ся усунути німецку опасность и тому принимают живу участь в европейской политике, штобы парализовати свободу німецкой акции. Крім того ведут они сильну коммунистичну пропаганду так в самой Німеччині, як и в краях, окружающих Німеччину и страшат Гитлера, же в случаю войны коммунизм выбухне в самой Німеччині.

Найповажнійша опасность грозит однак советской власти со стороны оппозиции, котра по убийстві Кирова ширит ся штораз сильнійше во внутрі самой партии. От того часу советска власть жие в страху и ту належит гля-

дати объяснения всім процесам и розстрілам. Сталинске правительство глядат тепер популярности поза коммунистичном партиом и тому иде оно тепер на руку таким стремлениям, котры до недавна преслідовано и давлено. Роме пише, же мусит там дойти и до перемены аграрной (рольной) политики.

С того видно, же главары советской власти сами переконуют ся, же коммунизм в практиці приносит лем біду и нужду.

Надвыжка державного бюджета. Рок бюджетный 1936/37 замкнено надвыжком приходов над выдатками в высоті около 2 милионы 400 тысяч злотых. Результат тот належит завдячити не лем приростови скарбовых доходов, але также поважным оцадностям. Министер финансов поручил урядам, штобы и в текучом року господаровали с таким самым оцадностью.

Всі місцевости над Попрадом достанут електричне світло. Державна фабрыка азотных звязей в Мосцицах почала перетігати проводы електричны с Мосциц до Нового Санча. В Новом Санчі заложено уж перши урядження. Проводы будут тягнути через Новый Санч и цілу долину Попрада так, же буде можна дати електричне світло всім надпопрадским місцевостям.

Баскы — найстарший народ в Европі — воюют о свои права.

Последны вѣсти с Испании голосят, же повстанчи войска посунули ся на полночи на баскийском фронті и же приближают ся до столицы басков, Бильбао. Газеты упоминают о республиці баскийской и о баскийском войску. С того выходило бы, же баскы сут отрубным народом и так ест в действительности.

Баскы сут народом отрубным от испанцев и далеко от него старшим, бо уходят за найстарший народ в Европі.

Як відомо с истории, ріжны народы проваляли ся через Европу и одны других выперали и мѣшали ся взаимно. Одны баскы жили от тысячей літ в недоступных горах Пиреней и живут там до тепер. Перед испанцами владѣли на полуострові Пиренейском римляне, перед римлянами — картагинцы, перед нима — иберы, народ мало знанный, але ище перед иберами жили там баскы.

Коли перед 5-тысячами лім вдерли ся до Пиренеев иберы, застали там уж басков, котрых не потрафіли уярмити. Старе баскийске предане говорит, же баскы пришли с острова, котрый закрыла вода. Если тото предане оперте на правді, то може быти, же они походят с легендарной суши Атлантиды, котра перед віками мала запасти ся в море.

Баскы живут в полнотной части Испании, над заливом Бискайским, далеко от головных дорог, котрыма подорожовали давно народы в Европі и віроятно тому заховали ся до тепер. Головны их міста Бильбао и Сан Себастьян, в котрых бесідуют по испанскы. Баскийским языком говорит лем населене сел. Баскы называют себе евскерами, а свой язык — евскера. Язык тот не ест зближенный до жадного европейского языка, ани до жадного языка світового и тот факт ест наибольшом загадком походження басков.

Баскы мают скору снідо-червеняву, великы носы, лица сухы. Припоминают они кус червеноскорых индиян, кус старинных египтян, кус жителей Корсыкы и французских бретонцев.

Всѣх их ест около 700 тысяч, с того 550 тысяч в Испании, а 150 тысяч во Франци. Поволи число их маліе и на пограничах вынаровольют ся.

Ест то народ трудолюбивый о высокой культурі. Сут храбры, вытревалы и уперты. Отличают ся великом релігиозностью и привязанем до католицкой віры.

Тот малый народ хоче жити. Тепер поднес голову, користаючи с домашной войны в Испании и хоче выбороти свою державность, котру мал за давных часов. В середных віках баскы прилучили ся до испанского княжества Каттылі, а пак ввошли в склад королевства Испании.

В р. 1876. утратили баскы свои права и привилегии. Баскы от того часу домагали ся при каждой случайности своих старых прав. Тепер бют ся они против повстанцов, бо мадрытске правительство прирекло привернути им давны права. Повстанцы не терпят басков. Ятрит их тото, же баскы оголосили власну республику и же поддерживают мадрытске правительство. Недавно повстанцы заняли одно с головных міст — Сан Себастьян, тепер идут бои о Бильбао.

Незадолго увидиме, якый буде дальший результат боев на том фронті и яка судьба встрітит окончательно тот найстарший народ

в Европі, котрый, хоц невеликий и не має власной литературы ани штуку, хоче однак жити власным житем и бе ся храбро за свои национальны права.

Незвычайны дороги льосу.

Незнаны сут дороги, по котрых ходит счастье. Доказом того ест незвычайна история селянки Сандецкой с Медзешина коло Варшавы.

Перед святами Рождества Христового Сандецка приїхала до Варшавы и згубила ту ручну торбинку. В торбинці находил ся льос державной льотереи. На другой день, переглядаючи табелю выгранных, довідала ся она, же на вѣй льос припала выграна в сумі 50 тысяч злотых.

Сандецка внесла до льотереи застережене, штобы никому не выплачено выграной, але сама также не могла достати грошей, бо припис говорит выразно, што штобы достати гроши, треба предъявити льос, при том, если не предложит ся льосу до выплаты в продолженю 4-ох місяцов, то льос тратит свою вартость.

Термин тот минал в другой половині квітня. И ту именно стала ся річ цікава. На оден день перед уплывом термину М. Барчевский, ловячи рыбу на удку в Вислі, вытягнул с воды торбинку и нашол в ней льос. Льос занес до колектуры и одна урядничка поїхала зараз до Сандецкой, котра в последном моменті подняла выгранные гроши.

Счастливого рыбака жде щедрa нагорода. Сандецка аж по найденю припомнула собі, же торбинку згубила, переходячи через мост Кербедя в Варшаві.

НАИБОЛЬШИ ГОТЕЛІ.

Наибольшы готелі на світі сут в Нью-Йорку. До Нью-Йорку приїжат денно перешло 300.000 людей и то ест причином великого розроста готелевого промысла. Притом техника будовы готелей выспециализовала ся небывало. Готель о 5-ох тысячах комнат и 3000-ах ванен не ест в Нью-Йорку ничим дивным.

Готелевы комнаты сут малы, о высоті до 3 м. Стіны сут мальованы олійном фарбом, штобы можна было их змывати. Комнаты до купания маленькы, але уряджены образцово. В каждой комнаті ест телефон. Нарочны лампы повідомляють гостя, же на долині ест до него лист або пакунок, а если гость потисне отвітный дзвонок, то в 3-ох минутах достае посылку до комнаты. Каждый гость достае рано газету, килька ріжных мыл, пера и колекцию листового паперу без окремой доплаты. Кореспонденцины карткы с видом готеля оплачат сам заряд готелю, бо уважат, же гость робит ему прислугу, бо му выработат рекламу. Готелі обслувають винды. Никто не ходит піше по сходах, особенно на гору.

Великы готелі мают в пивницах воличезны механичны пральні, в котрых пере ся простыні, ручники и оболочины. Ест тото зрозуміле, бо там каждый гость достае каждого дня свіжу постель, 10 ручников и 2 простыні.

Великы готелі мают кромі того импозантны басены с переплываючом морском водом. Сунелі в басенах можна брати цілый день.

Заряджене в справі грунт. податку.

В Дневнику Законов оголошено заряджене Мин. Финансов, котре порядкуе веі справы звязаны с грунтовым податком.

Меже иншим, справу доручаня платничих наказов упорядковано таким способом, же будут они доручаны лем тым платникам, котрых грунтовый податок переысшат суму 110 зл. Инных платников буде повідомляти ся ведля принятых місцевых звичаев.

Заряды гмин сут тепер обовязаны принимати вплаты на рахунок грунтового податку от платников, котрых грунтовый податок ест низший як 110 зл. Тым платникам заряды гмин будут высылати также упомнення на незаплаченный податок грунтовый. Всі, котры платят податок высший як 110 зл., будут выплачати тот податок в касах уряду скарбового.

Также упорядковано справу льгот в грунтовым порядку с причины шкody, втраты, або элементарной біды. Платники, котры понесут шкodu в землекладах и живом инвентарі с причины элементарной біды, и котрых доходы поменьшат ся от того о 15%, могут старати ся о льготы. Льготы будут уділяны через отложеное, розложеное на раты и через частичну або полну амортизацию грунтового податку разом с додатком самоуправным. Выдано также точны приписы, якы льготы будут давати с причины элементарных бід в лісах.

Ціны кавы и чаю.

В звязи с зарядженем Мин. Спр. Вн. Нр. 57/9—1, с дня 28. IV. т. р. Мин. Торг. и Пром. в порозумленю с представителями импортеров кавы и чаю усталидо от дня 1. мая т. р. на пространстві цілого краю слідуючи ціны кавы и чаю:

I. кавы в гатунках: Рио 7, Виктория 7, и в инных ровнорядных гатунках по 6,10 зл. за 1 кг.;

II. чаю в гатунках: Суматра, Цейльон и в гатунках и мѣшанках отвічаючих якостю тым гатункам по 16 зл. за 1 кг.

Кромі того Союз Импортеров собовязал ся:

1) впровадити в случаю засуществованя возможности набытя дешевших гатунков кавы (нпр. Робуста, Конго або Анголя) на рынок внутренний постепенно гатунок кавы „популярной“ в ціні деталічной, не высшой як 6,10 зл. за 1 кг.;

2) запевнити достаточне запотребоване внутреннего рынку в вычислены гатунки кавы и чаю, котре буде выносити штонайменьше 60% загального запотребованя;

3) удержати, яко обовязуючи теперешны ціны деталічны кавы и чаю лучших (дорозших) гатунков;

4) не погоршити якости жадного гатунку кавы и чаю;

5) запевнити деталістам в цінах обовязуючих от 1. мая зыск брутто не высший як 10% при каві и 12,5% при чаю;

6) позбавити возможности набытя товару у членов Союза тых деталістов, котры не подпорядкуют ся повышшим цінам и

7) счеркнути с листы Центр. Ком. Привозовой тых импортеров, членов Союза, котры бы продавали каву и чай деталістам, побераючим за тоты товары ціны высши от усталеных.

О жаданю и побераню высших цін належит повідомляти уряды гминны и городскы, котры донесут о том Староству в цілі укараня.

Весняны лікарскы зела.

Ніт в нашым краю такой закутінны, где не рослі бы зела, маючы кураціны свойства і ужываны в медыцыні. Але, на жаль, зела тоты марнуют ся часто, а аптекі спрагаджаюць іх с чужых краев. Зела тоты квітнут і пристаюць в ріжній порі року і тому зберанем их можна заняты ся от вчасной весны аж до поздой осени, запевняючы собі поважны доходы. Заняты ся тым могуць діти і люды старшы, або слабы, котры не надаюць ся до тяжкой работы.

Кто однак хоче заняты ся зберанем зел, ростучих дико, мусит познакомити ся с гдеякыма приписами і ведля них поступати, бо инакше шкода его работы. Так нпр. одны зела сушыт ся на сонці, другы — в тіні і кто не примінит ся до тых жадань, тот знищит зела, бо не будут они мати ані барвы, ані смаку, ані запаху, одним словом втратят всяку вартость.

Кромі того треба ся старати о тото, штобы мати одного зела **дуже**. Малым количеством аптыкар ся не интересує і не купит товару, хоць бы і дешево, але дуже одного товару гуртовник купит охотно і добре заплатит. Тото жаданє єст легке до выполнения, бо звычайно зела выстуваюць в гдеякых окрестностях в великых количествах в зависимости от климата, почвы і вмістимости в ней гдеякых складников. Прото тыж треба зберати передовсем лем тоты зела, котрых єст дуже.

На весну можна зберати: квіт конваліи,

квіт чорного бозу (бзика) і звычайный румянок пахнячий.

Квіт конваліи зберат ся зараз, як заквітне. Обрізує ся лем сам квіт без хвостиков, бо лем сам квіт має лічничі свойства. По обрізаню розстелити як найтоньше і сушити на сонці. Чим скорше высохне, тым має вышшу ціну.

Чорный боз (бзик) квітне біло або ясно жолто. Назву „чорный” достал от того, же его ягоды сут праві чорны. Єст то часто встрічаний корч, часом вырастат яко невеличке деревце. Квітне обильно. Як заквітне, треба зрывати цілы кытайкы квітя і сушити в тіні в продувном місці. Старший квіт, котрый уж переквітат, не має вартости. По высушеню квіт треба осмыкнути і гоны вышмарити. Добре высушений квіт має мати барву білу, або легко-жолту. Высушений на сонці, тратит барву, прото належит его сушити в тіні.

Румянок єст зело добре знане. До сушеня для кураціных цілей надає ся лем квіт совсем молодой, котрый начинат ся розвивати. Квіт старший с опущеныма білыма листками уж ся не надає, бо по высушеню кыршит ся на порошок. До сушеня обриват ся лем самы головки.

Зела, старанно высушены, переховує ся в мішках, до котрых можна их аж і сильно напхати. Держати в сухом продувном місці. Также в мішках пересылат ся их до продажи.

Не марнуїме навозу.

Всі тыпы ґрунту в Польщі, а особливо в наших горах, сут того рода, же потребуюць навозов. Ніт у нас таких ґрунтов, котры бы без навозов давали добры вроды. Прото тыж найголовнійшим клопотом газды єст старати ся о достаточне число навозу.

Звычайно стараня тоты ідуць в двох напрямках, а имено: селянин старат ся: 1) о оборник і 2) купує навозы штучны. Кромі того в послідных часах сіют селяне штотраз частійше гдеякы рослины на навозы зелены.

Натоміст совсем занедбаний і праві у нас незнаний єст **компост**, котрый єст знаменитым навозом на луку, пасовиска і яринны огороды. Навоз тот заслугує на увагу тым больше, же кромі кус заходу і работы нич не коштує. Штож то єст тот компост і с чого он повстає?

Компост єст то порохнячка о високой вартости навозовой, котра повстає через гните всілякых отпадкоў і нечистот, складаных с цілого господарства на одну купу. Заложене і удержанє компостовой купы не вымагає жадного знаня і єст можливе в каждом господарстві.

Каждый газда найде гдеси за будынками, найлучше за стодолом місце, котре може перезначити на компостову купу і найде также досыть отпадкоў, с котрых робит ся компост. Найотвітнійше єст місце, легко затінене, хороняче перед великым пересушенем компосту і обезпечене перед курами, котрых гребанє єст непожадане.

Коли маме уж обране місце под компостову купу, повинни мы весь с поля і обыстя, што не має вартости яко паша, постеліне, або навоз, перезначати на компост і складати на купу. Як маме компост, не можна нам охабяты по межах і стежках буряну, якый выполе-

ме с ґрядок і с поля, ані вышмаряти смітя, але тото весь мусиме выносити на компостову купу. Таким способом компостова куна буде рости скоро.

Если маме дуже матеріяла на компост, то найлучше єст закладати компостову купу каждого року, если єст его меньше, то што другой рок. Штобы отпадки замінили ся в добрый навоз і добре перегнили, треба их часто (што найменше три раз до року) перемішати. Перекопуючи треба купі надати форму чотыроугольну о высоті $\frac{3}{4}$ до 1 метра. Верх выровнати і заглубити радше до середины, штобы дожджева вода не стекала на боки, а еливалася до середины компостовой купы.

Хотячи одержати добрый навоз о високой вартости, треба до компосту додавати кус вапна, найлучше паленого, котре має тото свойство, же приспішат процес гнитя отпадкоў, а кромі того обогащат компост в важный навозовый складник. Компост належит также поляти часом гнояницом і додати до него отходы людскы, што обогащат компост в потас і азот.

Компост стає ся навозом втотчас, як єст совсем перегнилий. Добре приготовлений компост єст незаступленным навозом, особливо на луку і пасовиска, а также под тоты ярины, котры не любяць свіжого оборника (цыбуля, чеснок, редьковка і инши) і под овочевы дерева. Добре накомпостованє луку выстарчат на пару літ. Луку навозиме, вывозячи компост на весну і росшмаряючи его ровномірно по луці. Даючи компост под дерева, мішаме его с земльом, бо даный безпосередно на корені, спричинят их ненормальный розрост.

Добрым потасным навозом єст деревяный попель, котрый у нас также звычайно ся марнує. Особенно потребуюць попелу: горох, физола, боб і другы стручковы. Прото тыж попель належит складати до назначеной на тото ціль

скринь і на яр высівати под рослины стручковы, а также на луку, пасовиска і коничи.

Через заложене компосту і зберанє попелу увеличиме количество навозу, котрого николи не єст за дуже. Тоты ріжны отпадки господарскы, котры не приносяць нам жадной користи, замінены на компост, дадут нам великый хосен і пополнят существуючы навозовы недостатки. Кто раз отважит ся заложити у себе компост і зберати попель, тот уж николи не перестане тото робити, бо кромі порядку коло хаты, костає он ище навоз о високой вартости.

Як представляюць ся того-рочны засівы.

С великым заинтересованем слідят тепер люды стан засівов. Стан тот єст неодинаковый. В Злученых Державах Амерыкы Полночной увеличено значно пространство засіяного поля, але в гдеякых округах Злученых Держав і Канады засівы потерпіли от посухы.

Натоміст в цілої праві Европі озимины утерпіли от долгых дожджей. Лем в балканскых державах і в Італії стан озимиц єст добрый. Во Франції і в Німеччині вегетация озимин через холодну погоду єст опозднена. В многих місцах с причины долгых морозов без прикрывы сніжной мусіли, так як і у нас, **озимины** выорати. Через тото подорожіли сильно яры зерна.

С послідных докладов народных комисаріатов в совітской Росії о стані весняных засівов выникат, же в тек. року весняны управы опозднили ся там сильно. До конца марта засіяно там 5 і $\frac{3}{4}$ милиона гектаров поля, аджек о 3 і $\frac{3}{4}$ милионов гектаров меньше, як попередного року. Особенно планно представляюць ся засівы в урожайных землях украинскых над Чорным Морем.

На загал засівы представляюць ся в том року не надто добре. Але не знати, што принесут найблизши тыждні. Прото тыж трудно уж тепер бавити ся в пророка і кричати, же того року будут скупы жнива.

Нищити кретовиска, а не убивати кретов.

Крет єст уважаний часто за шкодника. Єст то мніне ошыбочне, бо крет не живит ся коренями рослин, як то гдеякым ся здає, лем хробакамі, пендракамі дожджанками і гусеницами многих шкодливых комах, котры жиють в землі. Там, где сут креты, там напевно єст в землі много шкодников, котры крет нищит і очищат с них почву.

С той причины крета убивати не треба, бо он єст помочником газды так само, як і співаючы пташкы, котры также нищат шкодливы мухы і комахы. Прото тыж так креты, як і пташы повинен селянин хоронити.

Если бы однак на поли, або на луці креты розмножили ся занадто і вышмаряли за дуже куп землі, то треба тоты купкы росшмаряты лопатом. Через кретовиска має газда все меньше шкоды, як от пендраков і другых подземельных шкодников, котры подгрызають корені рослин.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО”.

Що чути в світі.

Найстарший образ Ісуса Христа. На обшом собраню виртенбергского товариства антропологичного выголосил німецький ученый д-р. Ватцингер, професор университета в Тубинген, цікавий отчет о выкопалисках в старинном місті Дура над Евфратом.

В том именно місті нашол д-р. Ватцингер найстарше подобие Ісуса Христа. Образ представляет Спасителя, яко молодца. Он был помещенный в одной хаті, заміненой на капліцу в р. 232. т. е. перешло тысяч семсот літ тому назад.

В початках християнства не мальовали ани не різбили постати Ісуса Христа. Перед открытием д-ра Ватцингера за найстарши подобия Христа уважано тоты, котры найдено в римских катакумбах и котры походят с р. около 300.

Смертельны скокы людей - птахов. В последние часах люды селят ся на то, чтобы літати, як птахы по воздуху. Пробы тоты кончат ся однак часто смертю смільчаков.

Дня 25. квітня т. р. в часі летничих пописов над Венсен коло Парыжа згинул славный человек - птах Клементий Сон, американаец, оден с найотважнйших скакунов воздушных.

На тыждень передом згинула так само Едыта Клерк (француска). Клерк ишла всяди, где отбывали ся найопаснйши пописы со скоками. Бесідовано, же глядат смерти. Была она вдова по летчику, котрый убил ся, падаючи разом с самолетом. О ней гварено, же глядат подобной смерти. Пятсот раз скакала она с самолета и все выходила ціло. Але смерть не дае бавити ся с собом безкарно и за 501-им разом перед місяцем скочила и убила ся на місци.

В тыждень погодивше случило ся то само с Соном. Сон был то здоровый румяный молодец, котрый о скоках бесідовал: — Ах, то така дурничка! Скаче ся с самолета, як птах и летит ся в воздуху яке 3 тысячи метров. На высоти 500—600 метров, отверат ся крыла и опадат поволи на землю.

Таку „дурничку“ показал Сон дня 25. квітня, але тым разом закончила ся она страшно. Сон взнес ся на самолете на 3 км. высоко и выскочил с самолета. Початково видно было лем малу білу кульку, котра опадала штораз ниже. Уж видно добре его крыла, але в том моменті несе ся штоси в его воздухоплавательных прирядах и он падат на землю. Сильно потолченого, со слабыма проявами житя, перевезено его до шпиталя, где помер по пару годинах.

Борба со здичилым котом. В лісах в окрестности Смырны в Турции розмножили ся здичилы коты. Стали ся они утрапленем для місцевого населеня.

Недавно здичилый кот задусил хлопца ягня. Хлоп заставил недалеко обыстя желіза и по пару днях злапал ся в тоты желіза кот. Коли хлоп приблизил ся, чтобы убити кота, кот вырвал ся и шмарил ся на хлопца. На счастье недалеко были люды, котры приближали на ратунок. По долшой борбі удало ся кота застрілити килькома выстрілами с револьвера. В борбі той однак кот покалічил пару людей.

Самоход с панцерным шклом. В Полудневой Америкі ест мала республика Гондурас, котра має всего 1.500 самоходов и 30 мотоциклей. Але президент той республики має прекрасне авто марки Паккард, в котром шибы сут зроблены со шкла, отпорного на кулі.

В державах полуднево-американских бывает так часто повстаня и замахы на президентов, же таке авто може ся придати.

Затонул грецкий корабель. Грецкий корабель „Егеус“, котрый выїхал с углем с пристани в Гдыні, чтобы перевезти его до Аргентины столкнул ся дня 10. мая с американским кораблем „Насаба“ недалеко острова Бернгольм. Причином наїхания одного корабля на другой была густа гмла, серед котрой не видно нич было на пару кроков. Удар был так сильный, же пароход американский перебил стіну в грецком кораблі, от чого тот корабель затенил ся. Людей выратовано и они переїхали на американском пароході до Гдыні.

Вісти с краю.

Мыло подешевіло о 10 до 15%. На внесенне комиссии контролі цін, Мин. Пром. и Торг. порозуміло ся с Начальным Союзом Промысла Мылярского и обнижило ціны мыла вдетайличной торговлі — одны гатунки о 10%, а други о 15%. Середны и планшы гатунки мыла до праня подешевіют о 15%.

Если бы купцы жадали теперешных цін, або цін мало обниженных, належит о том доносити властям, котры потягнут выновных до острой ствітственности.

И зубом можна ся задусити. Недавно в Варшаві малый хлопчина Гробельский захворил тяжко, а его товариш Пьотровский умер серед таких самых болей. Вмерлу дітину подано секции в Заведеню Судовой Медицины и аж тепер выяснила ся причина смерти.

В желудку найдено нестравлены картофлі, а в гыртани зуб.

Стверджено, же Пьотровский, котрого матери торгуе яринами, забрал до кышені пару картофлей и сїл их суровы разом с товаришем на луці за хатом. Діти достали сильны корчи и побіжали до дому. На сходах Пьотровский упал и выбил собі два зубы, котры заткали му гыртань и стали ся причином удушени дітины. Гробельского уратовано.

Выбух попелнички. Лікар ветеринарии Виктор Базильчук мал в себе попелничку зроблену с части гранату. Недавно шмарил он до попелнички выпалену цыгаретку. Внет потом наступил выбух и попелничку росорвало. Показало ся, же в попелничці находил ся неушкодженный запальник гранату.

Черепкы попелнички поранили тяжко Базильчука.

Рыбы живородкы. Відомо, же рыбы и гады вылягают ся с яичок, котру называеме икром. Але меже нима находят ся также выключеня.

Гдеякы рыбы и гады родят ся живы. До таких належит оден гатунок ящуркы, котру называеме живородком.

Тепер в заливі Пуцком появили ся также живородны рыбы. Рыбакы польскы рідко коли их ловят, бо появляют ся у нас рідко и в малом числі. Сут то так званы квапы. Наибольши ловлі тых рыб занотовано в р. 1925. в заливі Пуцком.

Лист до Пана Бога. Почтовый Уряд в Вильні достал лист адресованный „до Пана Бога“. Лист тот отворено, чтобы найти адрес высылочного. В коперті находил ся лист слідуячого содержания:

„Любый Боже! Пишу до Тебе и прошу Тя, выслухай мя Боже, мы страшно бідны. Мама має нас всіх семеро, а няню нас оставил. Уж другой рочок, а мы нич не маме, ани черевичков, ани одежи, ани ідла. То мы Тя Боже просиме троє: я Елена, 8 літ, ученица II-ой клясы и мои два браты, Рысь має 6 рочков и Исидорок 2 рочки“. — Подписана Елена Кунцевич, Вильно, угол Швайцарский 3—6.

Почтовый Уряд переслал лист Добродітельному Товариству. Товариство выслало своего делегата, котрый отнашол родину, зложеноу с матери и 6-ро маленьких діточок, с котрых найстарша — Елена має 8 літ. Родина живе в страшной нужді. Отец, раненый на войні, звариовал и на правду перед двома роками вышол с дому и не вернул. Мати хапат ся каждой работы и замыкат діти в хаті.

КУПЛЮ ВЕЛИКУ ИЛЮСТРОВАНУ БИБЛИЮ

О. МАЩАКА.

Адресовати до администрации „Лемка“
Крыница.

**КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО.**

НЕХАЙ ЯКНАЙСКОРШЕ

**за асекуруе ся
в асекураційном Товаристві
ВИТА И КРАКОВСКЕ
во ЛЬВОВІ**

Асекурацію принимают на цілой Лемковщині
представителі: гг. Осиф Ямовицкий — Крыница - Село
и Михаил Перелом — Сянок.